



# INUIT ATAQATIGIIT INATSISARTUNI

---

Nuuk, 19. marts 2007

Inatsisartut Suleriaasianni § 36, imm. 1 naapertorlugu Naalakkersuisunut apeqqut imaattoq matumuuna saqqummiuppara:

**Ilinniartitaanermut pilersaarummut kiisalu ilinniartitaanermut immikkut ittumik suliniuteqarnissamut tunngatillugu nunatsinni folkehøjskolit atorpeqarsinnaanerit aammalu ilaatineqarnissaat eqqarsaatigalugu Naalakkersuisut qanoq pilersaaruteqarpat?**

(Inatsisartuni ilaasortaq: Olga P. Berthelsen, Inuit Ataqatigiit)

## **Tunngavilersuut:**

Kontomi pingaarnermi 62.01.04-mi suliniutit ilinniartitaanermut pilersaarummut attuumassuteqartut kiisalu ilinniartitaanermut pilersaarut tunngavigalugu suliniutit, ilinniartitaanermi sammiginnut tamanut atuutsinneqartussat pineqarput.

Aningaasanut Inatsimmi taamatut allassimasoqarnerani isumaqarpunga paasineqartariaqartoq nunatsinni ilinniartitaanerit suulluunniit pineqartut, tassunga ilaalluinnarlutik nunatsinni folkehøjskolit atorlugit ilinniartitsinerit.

Nunatsinni folkehøjskolini ukiumut ilinniarusullutik qinnuteqartartut ikigisassaangillat. Sisimiuni Knud Rasmussen-ip Højskolianut 2007-imi ilinniarusullutik qinnuteqarsimasut inuit 235-usimapput. Taakkuninnga taamaallaat ukiumut 40-t tiguneqarsinnaapput, taamaasillunilu qinnuteqarsimagaluit 17%-nnai tiguneqarsinnaasimallutik.

Qaqortumi Sulisartut Højskolianut ukiumut agguaqatigiissillugu inuit 160-t qinnuteqartarput, taakkunaniillu 40-t kisimik ukiumut tiguneqarsinnaasarlutik. Tassa qinnuteqartut 25%-iinnat tiguneqartarlutik.

Ukiuni makkunani nunatsinni inuit ilinniarnissaannik annertuumik oqariartorfiusuni ilinniarusullutik qinnuteqartut amerlanerpaat tiguneqartarnissaat pingaaruteqarlunnarpoq, taamaalilluni siunissaq ungasinnerusoq eqqarsaatigalugu anguniagaq, tassalu nunatsinni ilinniarsimasut amerlinissaat, anguneqarsinnaassammat.

Ilanngullugu oqaatigerusuppara 2008-mi meeqqat atuarfianit soraarummeertussat amerlasuut eqqarsaatigigaanni, nunatsinni folkehøjskolit ilinniagaqarfittut allatulli atorluarneqarnissaat pingaaruteqartoq.

Taamaattumik paaserusunnarpoq ilinniartitaanermut pilersaarummut atatillugu folkehøjskolit pilersaarutitut ukiuni tulluuttuni ilaatinneqarsinnaanersut, 2008-mi meeqqat atuarfiannit ukiukkaartumik atuaqatigiiaat marlut aninissaat tunngavigalugu, kiisalu siunissami ilinniagaqarnissamut pisariaqartitsisut amerleriarnissaat eqqarsaatigalugu.